

V. KAZNENE ODREDBE

Član 41.

Novčanom kaznom u iznosu od 500 KM do 2.000 KM kaznit će se za prekršaj općinski načelnik:

- 1) ako ne odredi plaću za radno mjesto na koje je državni službenik, odnosno namještenik postavljen;
- 2) ako odredi dodatak na plaću po osnovu uvjeta rada suprotno odredbama člana 20. ove Odluke;
- 3) ako ne donese rješenje o plaći ili rješenje o promjeni visine plaće (član 17. stav 2. i 6. ove Odluke);
- 4) ako odredi naknade suprotno čl. 9. do 15. ove Odluke, odnosno čl. 22. - 25. ove Odluke;
- 5) ako ne donese Pravilnik o plaćama i naknadama (član 42. ove Odluke).

VI. PRELAZNE I ZAVRŠNE ODREDBE

Član 42.

Odredbе čl. 11. i 12. ove Odluke, odnosno čl. 25. i 26. ove Odluke koje se odnose na naknade za topli obrok i regres za korištenje godišnjeg odmora početi će se primjenjivati narednog mjeseca od dana potpisivanja izmjena i dopuna Kolektivnog ugovora za službenike organa uprave i sudske vlasti u Federaciji, kojim su regulisane ove naknade.

Član 43.

U skladu sa ovom Odlukom, Pravilnicima o unutrašnjoj organizaciji Općine Stari Grad Sarajevo, zakonskim i drugim propisima, općinski načelnik će donijeti Pravilnik o plaćama, naknadama i drugim primanjima uposlenika, kojim će utvrditi koeficijente za plaće pojedinačno za svako radno mjesto, te načine ostvarivanja individualnih prava.

Pravilnik iz stava 1. ovog člana donijet će u roku od 30 dana od dana stupanja na snagu ove Odluke.

Član 44.

Za sva pitanja iz oblasti plaća i naknada koja nisu regulisana ovom Odlukom, neposredno će se primjenjivati odredbe Zakona i Kolektivnog ugovora.

Član 45.

Danom stupanja na snagu ove Odluke prestaju da važe općinske odluke koje se odnose na utvrđivanje platnih razreda i koeficijenata za plaće, naknada plaća i dodataka na plaće nosilaca funkcija, savjetnika, te državnih službenika i namještenika Općine Stari Grad Sarajevo, i to:

- Odluka o pravima nosioca funkcija i savjetnika u Općini Stari Grad Sarajevo ("Službene novine Kantona Sarajevo", broj 26/10 - Prečišćeni tekst);
- Odluka o utvrđivanju koeficijenata za plaće državnih službenika i namještenika u službama Općine Stari Grad Sarajevo; ("Službene novine Kantona Sarajevo", broj 11/07, 6/08 i 28/09);
- Odluka o utvrđivanju koeficijenata za plaće u Stručnoj službi Općinskog vijeća Stari Grad Sarajevo ("Službene novine Kantona Sarajevo", broj 15/07 i 6/08);
- Odluka o utvrđivanju koeficijenata za plaće zamjenika pravobranioca i namještenika Pravobranilaštva Općine Stari Grad Sarajevo ("Službene novine Kantona Sarajevo", broj 15/07 i 6/08).

Član 46.

Ova Odluka stupa na snagu narednog dana od dana objavljivanja na Oglasnoj ploči Općine Stari grad Sarajevo, a naknadno će se objaviti u "Službenim novinama Kantona Sarajevo".

Broj 02-49-114/13  
28. marta 2013. godine  
Sarajevo

Predsjedavajući  
Općinskog vijeća Stari Grad  
Vedran Dodik, s. r.

Na osnovu člana 1. stav 3. Odluke o pravima nosilaca funkcija i savjetnika u Općini Stari Grad Sarajevo - Prečišćeni tekst ("Službene novine Kantona Sarajevo", broj 26/10) i člana 25. i 31. Statuta Općine Stari Grad Sarajevo ("Službene novine Kantona Sarajevo",

beoj 42/12 - Prečišćeni tekst i 11/13), Općinsko vijeće Stari Grad Sarajevo, na sjednici održanoj 28. marta 2013. godine, donosi

**ODLUKU**

**O IZMJENAMA I DOPUNAMA ODLUKE O  
NAKNADAMA I DRUGIM PRAVIMA OPĆINSKIH  
VIJEĆNIKA I ČLANOVA RADNIH TIJELA  
OPĆINSKOG VIJEĆA STARI GRAD SARAJEVO**

Član 1.

U Odluci o naknadama i drugim pravima Općinskih vijećnika i članova radnih tijela Općinskog vijeća Stari Grad Sarajevo ("Službene novine Kantona Sarajevo", broj 29/10), u članu 4. stav (1), iza riječi "paušalna mjesečna naknada", brišu se riječi "na osnovu koeficijenta 3,52" i piše novi tekst koji glasi: "na osnovu koeficijenta 1,8"

U istom članu u stavu (2) iza riječi "paušalna mjesečna naknada" briše se dosadašnji tekst i piše novi tekst koji glasi: "u iznosu od 60,00 KM."

U istom članu u stavu (3) iza riječi "paušalna mjesečna naknada", briše se dosadašnji tekst i piše novi tekst koji glasi: "u iznosu od 60,00 KM."

Član 2.

Ovlašćuje se Komisija za propise i Statut Općinskog vijeća Stari Grad Sarajevo, da sačini prečišćeni tekst Odluke o naknadama i drugim pravima Općinskih vijećnika i članova radnih tijela Općinskog vijeća Stari Grad Sarajevo.

Član 3.

Odluka o izmjeni i dopuni Odluke o naknadama i drugim pravima Općinskih vijećnika i članova radnih tijela Općinskog vijeća Stari Grad Sarajevo stupa na snagu danom donošenja, a naknadno će biti objavljena u "Službenim novinama Kantona Sarajevo."

Broj 02-49-117/13  
Mart 2013. godine  
Sarajevo

Predsjedavajući  
Općinskog vijeća Stari Grad  
Sarajevo  
Vedran Dodik, s. r.

Na osnovu člana 63. Zakona o građevinskom zemljištu Federacije Bosne i Hercegovine ("Službene novine Federacije BiH", broj 25/03, 16/04 i 67/05), a u vezi sa članom 53. Zakona o eksproprijaciji Federacije Bosne i Hercegovine ("Službene novine BiH", broj 70/07), i člana 25. Statuta Općine Stari Grad Sarajevo-Prečišćeni tekst ("Službene novine Kantona Sarajevo", broj 42/12), Općinsko vijeće na sjednici održanoj 28.03.2013. godine, donijelo je

**ODLUKU**

**O UTVRĐIVANJU VISINE NAKNADE ZA  
GRAĐEVINSKO, POLJOPRIVREDNO I GRADSKO  
GRAĐEVINSKO ZEMLJIŠTE ZA 2013. GODINU**

Član 1.

Ovom Odlukom utvrđuje se visina naknade za građevinsko, poljoprivredno i gradsko građevinsko zemljište u državnom i privatnom vlasništvu koje se preuzima, odnosno ekspropriše od ranijih vlasnika i koje se dodjeljuje investitorima u svrhu izgradnje, odnosno legalizacije već izgrađenih objekata (stambenih, poslovnih, proizvodnih i drugih) na području Općine Stari Grad Sarajevo za 2013. godinu.

Član 2.

Naknada za građevinsko, poljoprivredno i gradsko građevinsko zemljište iz člana 1. ove Odluke određuje se u skladu sa članom 53. Zakona o eksproprijaciji Federacije Bosne i Hercegovine kao tržišna vrijednost, a prema zonama gradskog građevinskog zemljišta Općine Stari Grad Sarajevo.